

# SIRAH: INSAN MULIA YANG DIRINDUI

## Wahyu Allah SWT kepada Rasulullah SAW

Rasulullah SAW mula menerima wahyu ketika Baginda SAW berumur 40 tahun. Wahyu pertama yang diturunkan ialah ayat 1 hingga ayat 5 surah al-'Alaq (العلق) di Gua Hira'. Hal ini bertepatan dengan hadis Baginda SAW yang telah diriwayatkan oleh Imam al-Bukhari dalam Sahihnya;

*Perkara pertama yang mula-mula berlaku kepada Rasulullah s.a.w. ialah mimpi baik semasa tidur. Baginda hanya bermimpi melihat ia datang seperti cahaya subuh. Kemudian ditimbulkan kepada Baginda rasa cinta untuk berkhulwah (bersendirian). Baginda berkhulwah di Gua Hira. Baginda beribadat di dalamnya untuk beberapa malam sebelum pulang menemui keluarganya bagi mengambil bekalan untuk khulwah seterusnya. Kemudian Baginda kembali menemui Khadijah, mengambil bekalan yang seumpamanya. Sehingga wahyu kebenaran diturunkan kepada Baginda ketika berada di Gua Hira. Malaikat (Jibril) datang menemui Baginda seraya berkata: Bacalah. Baginda berkata: Aku tidak tahu membaca. Baginda menceritakan: Maka dia memegang dan menutupi aku sehingga aku merasa kepenatan. Kemudian dia melepaskan aku. Dia berkata lagi: Bacalah. Maka aku berkata: Aku tidak tahu membaca. Maka dia memegang dan menutupi aku untuk kali kedua sehingga aku merasa penat. Kemudian dia melepaskan aku. Dia berkata kembali: Bacalah. Maka aku berkata: Aku tidak tahu membaca. Maka dia memegang dan menutupi aku untuk kali ketiga. Kemudian dia melepaskan aku seraya berkata:*

قَالَ تَعَالَى: ﴿اقْرَأْ بِاسْمِ رَبِّكَ الَّذِي خَلَقَ ۝ خَلَقَ الْإِنْسَانَ مِنْ عَلَقٍ ۝ اقْرَأْ وَرَبُّكَ الْأَكْرَمُ ۝ الَّذِي عَلَّمَ بِالْقَلَمِ ۝ عَلَّمَ الْإِنْسَانَ مَا لَمْ يَعْلَمْ﴾ العلق: ١ - ٥

Maksudnya:

*Bacalah (wahai Muhammad) dengan nama Tuhanmu yang menciptakan (sekalian makhluk). Dia menciptakan manusia dari sebuku darah beku. Bacalah, dan Tuhanmu Yang Maha Pemurah. Yang mengajar manusia melalui pena dan tulisan. Dia mengajarkan manusia apa yang tidak diketahuinya. (Al-'Alaq: 1-5)*

Begitulah keadaan Baginda SAW mula menerima wahyu daripada Allah SWT. Baginda SAW sangat takut dan bimbang sehingga badan Baginda SAW menggigil. Setelah itu, Baginda SAW pulang menemui isteri Baginda SAW, Khadijah Binti Khuwailid, seraya berkata: "selimutkan aku, selimutkan aku". Setelah Baginda SAW kembali tenang, Baginda SAW menceritakan kepada Khadijah RA apa yang telah berlaku dan Khadijah RA segera menenangkan lagi keadaan Baginda SAW.

Hadis ini menerangkan kepada umat manusia bahawa permulaan penerimaan wahyu Allah SWT bukanlah satu perkara yang ringan dan ringkas. Rasulullah SAW adalah utusan Allah SWT dan menerima wahyu daripada Allah SWT untuk disampaikan kepada seluruh umat manusia.